

# Topik ► Kaedah Asas

## 5 3: Kesukaran Membawa Kemudahan

(الْمَشَقَةُ تَجْلِبُ التَّيْسِيرَ)

### HASIL PEMBELAJARAN

Pada akhir topik ini, anda seharusnya dapat:

1. Menerangkan maksud Kaedah Asas 3 (kesukaran membawa kemudahan atau al-masyaqah tajlib al-taysir), contoh dan sumber asal atau dalilnya;
2. Membezakan tiga kategori dan empat kriteria masyaqah yang membawa kemudahan mengikut perspektif syarak;
3. Mengenal pasti tujuh faktor keringanan syarak;
4. Menjelaskan rukhsah syarak dari sudut amalan ibadah dan status hukum;
5. Mengenal pasti pecahan daripada Kaedah Asas 3; dan
6. Menghuraikan peranan dan implikasi Kaedah Asas 3 dalam memutuskan sesuatu hukum dan fatwa di Malaysia.

## ► PENGENALAN

Islam merupakan “din al-Rahmah” iaitu agama yang penuh dengan rahmat Allah. Toleransi dan keraianya terhadap umat manusia cukup mengagumkan. Sekiranya umat Islam memahami sedalamnya syariat Islam dengan penuh penghayatan, pastinya mereka tidak akan merasa susah dan payah dalam melaksanakan amalan dan ajaran Islam dalam kehidupan sehari-hari mereka. Ini adalah kerana perlaksanaan Islam adalah anjal dengan memberikan kemudahan mengikut kemampuan dan keupayaan manusia tanpa mentaklifkan sesuatu yang boleh membebangkan mereka ke dalam kesusahan dan tidak memberi sesuatu yang tidak bertepatan dengan naluri dan fitrah mereka. Inilah kehendak dan rahmat Allah s.w.t. iaitu apabila hamba-Nya melakukan ibadah, mereka tidak ditimpah sebarang kesusahan dan kepayahan.

Oleh itu, topik kelima ini akan membincangkan konsep kemudahan dalam beribadat di mana ia berkait rapat dengan kaedah ketiga iaitu kaedah kesukaran membawa kemudahan atau al-masyaqqah tajlib al-taysir. Kaedah ini merupakan salah satu antara kaedah asas dan utama serta disebut sebagai “al-qawa’id al-khams al-kubra”.

Dalam topik ini, kita akan membincangkan pengertian dan penguraian kaedah, penjelasan istilah al-masyaqqah dan al-taysir, kategori, kriteria, faktor dan rukhsah syarak dari sudut ibadah dan status hukum. Ini diikuti oleh penjelasan tentang sumber asal atau dalil kaedah, contoh dan aplikasi kaedah serta kaedah pecahan. Akhir sekali, peranan kaedah dalam memutuskan sesuatu hukum dan fatwa terhadap isu fiqh semasa di Malaysia akan turut dijelaskan kepada anda. Sudahkah anda bersedia? Ayuh kita mulakan!

### 5.1 PENGERTIAN DAN HURAIAN KAEDAH ASAS 3

Pertama sekali, mari kita pelajari maksud al-masyaqqah dan al-taysir. Al-masyaqqah (المشقة) bererti kepayahan, kesukaran, kerumitan dan kesulitan. Sementara al-taysir (التيسير) membawa maksud kemudahan. Apabila dua istilah ini digabungkan, mereka menerbitkan satu kaedah fiqh yang bermaksud **kesukaran membawa kemudahan**. Pengertian masyaqqah atau kesukaran di sini berdasarkan pendapat fuqaha ialah kesulitan dalam menunaikan perintah Allah s.w.t. (ibadah ketaatan kepada-Nya) yang boleh membawa bebanan dan kemudaratannya kepada manusia. Melalui kesukaran tersebut, maka ia terlepas daripada tanggungjawab syarak. Taysir atau keringangan pula maksudnya berlawanan dengan kesukaran di mana ia merujuk kepada sesuatu yang tidak membebangkan manusia.

Oleh itu, dengan kata lain, bebanan yang menjadi kesusahan kepada umat manusia itu hendaklah dihindarkan. Ini adalah kerana melalui prinsip Kaedah Asas 3 ini, Islam memberi pengecualian kepada manusia apabila berhadapan dengan situasi yang mendesak. Bentuk pengecualianya adalah dengan memberi kelonggaran atau keringangan hukum dengan membenarkan pemilihan alternatif lain kepada setiap orang dalam menghadapi pelbagai rintangan dan halangan. Berdasarkan kaedah ini, terbentuklah semua hukum **rukhsah** dalam syariat Islam.

## 5.2 CONTOH APLIKASI KAEDAH ASAS 3

Boleh anda senaraikan beberapa contoh bagi kaedah ini? Antara contoh yang terbentuk daripada kaedah ini ialah:

- Doktor lelaki diberi kelonggaran boleh melihat aurat wanita ajnabi dengan tujuan untuk menjalankan rawatan;
- Pensyarah atau guru lelaki diberi kelonggaran untuk melihat pelajar wanita ajnabi dengan tujuan menyampaikan ilmu pengetahuan atau seumpamanya;
- Disyariatkan talak (cerai) dan khuluk (tebus talak) untuk kemudahan kepada pasangan yang tidak serasi; dan
- Disyariatkan fasakh disebabkan ada kecacatan atau keaiban pada pasangan (seperti sakit mental, kaki dera, penagih dadah atau seumpamanya).



### AKTIVITI 5.1

- Huraikan dengan jelas kaedah al-masyaqqa tajlib al-taysir.
- Bincangkan bersama rakan anda pengertian al-masyaqqa dan al-taysir menurut terminologi fiqh.
- Bincangkan secara berkumpulan contoh semasa yang berkaitan dengan kaedah al-masyaqqa tajlib al-taysir, khususnya dalam ibadah sehari-hari bagi mukallaf.

## 5.3 SUMBER ASAL ATAU DALIL KADEAH ASAS 3

Asal atau dalil kaedah adalah didasarkan atau dirujuk kepada dalil al-Quran dan hadis. Antaranya ialah seperti yang dinyatakan dalam Jadual 5.1.

**Jadual 5.1:** Sumber Asal atau Dalil Kaedah al-Masyaqqah Tajlib al-Taysir

Sumber	Dalil
Al-Quran	<p>Firman Allah s.w.t.:</p> <p style="text-align: center;">بِرِيدُ اللَّهِ بِكُمُ الْيُسْرَ وَلَا يُرِيدُ بِكُمُ الْعُسْرَ</p> <p>Maksudnya: "Allah menghendaki kamu beroleh kemudahan dan Dia tidak menghendaki kamu menanggung kesukaran."</p> <p style="text-align: right;">(Surah al-Baqarah 2:185)</p>
	<p>Firman Allah s.w.t.:</p> <p style="text-align: center;">وَمَا جَعَلَ عَلَيْكُمْ فِي الدِّينِ مِنْ حَرْجٍ</p> <p>Maksudnya: "Dan Dia tidak menjadikan kamu menanggung sesuatu keberatan dan susah payah dalam perkara agama."</p> <p style="text-align: right;">(Surah al-Hajj 22:78)</p>
	<p>Firman Allah s.w.t.:</p> <p style="text-align: center;">لَا يُكَفِّفُ اللَّهُ نَفْسًا إِلَّا وُسْعَهَا</p> <p>Maksudnya: "Allah tidak membebani seseorang kecuali sesuai dengan kemampuannya."</p> <p style="text-align: right;">(Surah al-Baqarah 2: 286)</p>
Hadis Nabi	<p>Sabda Rasulullah s.a.w.:</p> <p style="text-align: center;">بَعْثُتُ بِالْحُنْفَيْةِ السَّمْمَحَةِ</p> <p>Maksudnya: "Aku diutuskan untuk membawa syariat yang benar dan bertoleransi."</p> <p style="text-align: right;">(Ahmad, Baqi al-Ansar, Hadis Abi Umamah al-Bahiliy, Bil. 21260)</p>
	<p>Sabda Rasulullah s.a.w.:</p> <p style="text-align: center;">إِنَّ هَذَا الدِّينَ يُسْرٌ</p> <p>Maksudnya: "Agama itu mudah, tidak memberatkan."</p> <p style="text-align: right;">(al-Nasa'i, Kitab: al-Iman wa syara'i'uhu, Bab: al-Din Yus, Bil. 4948. Al-Bukhari, Kitab: al-Iman, Bil. 38)</p>

	<p>Sabda Rasulullah s.a.w.:</p> <p style="text-align: right;">يَسِّرُوا لَهُمْ وَلَا تُعَسِّرُوهُمْ</p> <p>Maksudnya: "Mudahkanlah mereka dan jangan kamu menyulitkan."</p> <p>(al-Bukhari, Kitab: al-Adab, Bab: Qawl al-Nabiy: Yassiru wa la Tu'assiru, Bil. 5660. Muslim, Kitab: al-Jihad wa al-Sayr, Bil. 3264.)</p>
--	---




### AKTIVITI 5.2

1. Sebutkan satu sumber asal atau dalil bagi kaedah kesukaran membawa kemudahan daripada al-Quran dan hadis Nabi.
2. Anda telah mempelajari beberapa sumber asal atau dalil bagi kaedah kesukaran membawa kemudahan. Selain yang dinyatakan dalam Jadual 5.1, cuba anda cari dalil lain daripada hadis sahih dan ayat al-Quran yang turut sama membincangkan tentang perkara dan kaedah tersebut.

## 5.4

### KATEGORI MASYAQQAH MENGIKUT PERSPEKTIF SYARAK

Apabila masyaqqah dijadikan sebagai dasar hukum dan kemudahan syarak, maka ia mempunyai implikasi dalam penetapan hukum. Penentuan konsep masyaqqah dan kriteria yang terdapat padanya merupakan perkara penting untuk dikaji dan dianalisis. Secara umumnya, para ulama telah mengategorikan kriteria masyaqqah kepada tiga tahap seperti yang ditunjukkan dalam Rajah 5.1 berikut.



Rajah 5.1: Tiga kategori masyaqqah mengikut perspektif syarak

Bahagian seterusnya akan membincangkan ketiga-tiga kategori ini dengan lebih lanjut.

### 5.4.1 Kesukaran yang Sangat Berat (Al-Masyaqqaah Al-'Azimah)

Menurut pandangan ulama, kesukaran yang sangat berat (al-masyaqqaah al-'azimah) merupakan sesuatu masyaqqaah dalam situasi yang **mendesak** atau **mengancam kepentingan** secara "dharuriyyat khams" (darurat melibatkan agama, nyawa, akal, nasab dan harta).

Kategori masyaqqaah ini **wajib diberi rukhsah** untuk memelihara jiwa dan menyelamatkan diri. Ini adalah kerana ia memberi implikasi dalam perlaksanaan ibadah dan ketaatan kepada Allah s.w.t. Sebagai contoh, berpuasa di siang hari pada bulan Ramadhan, pada asalnya adalah masyaqqaah yang ringan. Namun, apabila seseorang itu dalam keadaan sakit yang kritikal dan dia tidak berupaya untuk berpuasa serta bimbang dengan keselamatan dirinya, maka Islam agama yang penuh dengan rahmah dan Pencipta-Nya yang Maha Rahman memberi rukhsah untuk berbuka bagi menghindarkan nyawanya atau dirinya terancam.

### 5.4.2 Kesukaran Tahap Pertengahan (Al-Masyaqqaah Al-Mutawassitah)

Tahukah anda bahawa masyaqqaah ini perlu diberi penelitian dan kajian yang terperinci untuk dikategorikan? Ini adalah kerana sekiranya masyaqqaah tersebut hampir dengan masyaqqaah 'azimah, maka ia memperoleh rukhsah. Namun, jika sekiranya ia hampir dengan masyaqqaah khafifah, maka ia tidak memperoleh rukhsah syarak tersebut.

Berikut adalah contoh bagi masyaqqaah yang hampir dengan masyaqqaah 'azimah: Suatu lapangan terbang terbakar dan menjelaskan kesemua sistem operasi penerbangannya sewaktu musim haji. Oleh itu, ia tidak berupaya untuk beroperasi seperti biasa. Disebabkan masalah ini, jemaah haji pada musim tersebut tidak dapat melaksanakan haji mereka. Maka, status hukum dalam situasi sedemikian ialah tidak wajib bagi mereka melakukan ibadah haji.

Bagi masyaqqaah yang hampir dengan masyaqqaah khafifah, contohnya, seperti berasa sedikit sakit atau pening apabila berasak-asak semasa melakukan ibadah haji. Sakit yang ringan itu tidak akan mempengaruhi hukum dan tidak perlu dianggap sebagai sesuatu yang menyukarkan. Ini adalah kerana menghasilkan

kepentingan ibadah itu adalah lebih awla (utama) daripada menolak masyaqqah yang kecil ini, di mana ia biasanya tidak dipedulikan dan diabaikan.

### **5.4.3 Kesukaran Tahap Ringan (Al-Masyaqqah Al-Khafifah) atau Kesukaran Tahap Biasa (Al-masyaqqah Al-'adiyah)**

Masyaqqah di peringkat ini tidak dianggap sesuatu yang perlu diberi rukhsah. Ini adalah kerana ia tidak memberi kesan kepada keringanan hukum. Sebagai contoh, sedikit kesakitan di jari tangan, kaki atau seumpamanya. Sakit yang ringan ini tidak menjelaskan status hukum kerana kepentingan ibadah dan kemuliaannya adalah lebih wajar diutamakan berbanding sakit ini.


## **5.5 KRITERIA MASYAQQAH YANG MEMBAWA KEMUDAHAN**

Tahukah anda terdapat empat kriteria masyaqqah yang memperoleh kemudahan? Empat kriteria masyaqqah yang memperoleh kemudahan adalah seperti berikut:

- (a) Masyaqqah yang tidak ada pertembungan dengan nas syarak atau qat'i;
- (b) Masyaqqah yang melebihi batasan keupayaan ataupun di luar kemampuan seseorang. Namun, jika sebaliknya iaitu kesukaran di tahap biasa (masyaqqah 'adi) yang mana ia sememangnya perlu dihadapi, maka ia tidak memberi apa-apa kesan hukum kepadanya. Sebagai contoh, usaha atau kerja keras untuk memperoleh rezeki;
- (c) Masyaqqah yang memberatkan mukallaf dalam melakukan ibadah; dan
- (d) Tidak terdiri daripada masyaqqah yang sememangnya perlu ditanggung oleh mukallaf seperti masyaqqah dalam berjihad fi sabillillah ataupun masyaqqah yang dihadapi dalam menerima hukuman hudud seperti hukuman sebatan bagi orang yang meminum arak.

## 5.6 FAKTOR KERINGANAN SYARAK

Apakah faktor keringanan syarak? Terdapat tujuh faktor keringanan yang diberikan oleh syarak dalam ibadah seperti yang ditunjukkan dalam Rajah 5.2.



Rajah 5.2: Tujuh faktor keringanan syarak

Tujuh faktor ini diterangkan dengan lebih lanjut melalui contohnya dalam Jadual 5.2.

**Jadual 5.2:** Contoh Keringanan Syarak

Faktor Keringanan Syarak	Contoh
Musafir (السَّفَرُ)	Qasar solat, solat jamak, berbuka puasa dan diharuskan meninggalkan solat Jumaat.
Sakit (الْمَرَضُ)	Diharuskan meninggalkan solat Jumaat, meninggalkan puasa (qada apabila sembuh) dan diharuskan tayamum ketika sukar menggunakan atau mencari air.
Terpaksa atau Dipaksa (الْإِكْرَاهُ)	Kelaparan atau kehausan yang mengancam nyawa, diharuskan makan atau minum benda haram, dipaksa (yang mengancam nyawa) untuk mentalakkan isteri tetapi hatinya masih tetap dalam ikatan perkahwinan dan dipaksa mensyirikkan Allah tetapi hatinya masih tetap beriman.
Lupa (الْتَّسْيَانُ)	Tidak batal puasa sekiranya makan dan minum dalam keadaan terlupa.
Kejahilan (الْجَهْلُ)	Dimaafkan kejahilannya, jika dia mengambil sesuatu yang haram di sisi agama, namun dia tidak mengetahui hukumnya seperti mengambil hak orang lain yang disangkakan hartanya.
Kesukaran Umum yang Tidak Dapat Dihindarkan (عُمُومُ الْبُلْوَى)	Segala najis yang sukar dihindarkan (dihilang dan dielakkan) adalah dimaafkan seperti solat dengan najis yang sukar dielakkan seperti nanah bisul, percikan air becak di musim hujan dan terkena habuk yang dibawa angin kencang.
Kekurangan (النَّقْصُ)	Kanak-kanak dan orang gila tidak dibebankan dengan tanggungjawab dan taklif syarak atau tanggungjawab terhadap kaum wanita adalah lebih ringan berbanding kaum lelaki.

**5.7****RUKHSAH SYARAK DARI SUDUT AMALAN IBADAH**

Menurut pendapat ulama, rukhsah itu ada tujuh jenis. Ketujuh-tujuh jenis ini diterangkan dengan lebih lanjut menggunakan contoh seperti yang dinyatakan dalam Jadual 5.3.

**Jadual 5.3:** Tujuh Rukhsah Syarak dari Sudut Kedudukan Amalan Ibadah dan Contohnya

Jenis	Contoh
Keringanan dengan Menggugurkan Kewajipan (تَحْفِيفٌ إِسْقاطٌ)	<ul style="list-style-type: none"> <li>Digugurkan kewajipan solat Jumaat disebabkan ada halangan tertentu.</li> <li>Digugurkan kewajipan ibadah haji disebabkan keuzuran.</li> </ul>
Keringanan dengan Mengurangkan Bebanan (تَحْفِيفٌ تَنْقِيصٌ)	<ul style="list-style-type: none"> <li>Qasar solat (mengurangkan solat Zohor atau Asar menjadi dua rakaat).</li> </ul>
Keringanan dengan Gantian atau Penukaran (تَحْفِيفٌ إِبْدَالٌ)	<ul style="list-style-type: none"> <li>Menukar ibadah puasa kepada berbuka bagi orang yang uzur.</li> <li>Menggantikan kedudukan solat bagi orang sakit yang tidak mampu berdiri kepada duduk, baring atau menggunakan isyarat.</li> </ul>
Keringanan dengan Mendahulukan (تَحْفِيفٌ تَقْدِيمٌ)	<ul style="list-style-type: none"> <li>Solat jamak takdim dalam musafir.</li> <li>Mendahulukan pembayaran zakat sebelum cukup hawl atau sebelum sampai waktunya.</li> </ul>
Keringanan dengan Penangguhan (تَحْفِيفٌ تَأْخِيرٌ)	<ul style="list-style-type: none"> <li>Solat jamak takhir dalam musafir.</li> <li>Menangguhkan ibadah puasa dalam musafir.</li> <li>Mentakhirkan solat demi menyelamatkan mangsa kebakaran, lemas, rogol dan seumpamanya.</li> </ul>
Keringanan Mendapat Pengecualian daripada Hukum Asal (تَحْفِيفٌ تَرْجِيعٌ)	<ul style="list-style-type: none"> <li>Diharuskan makan bangkai kerana terdesak.</li> <li>Diharuskan minum arak kerana terpaksa sebab terlalu dahaga dan ketiadaan air lain untuk diminum.</li> <li>Diharuskan bekerja di bank yang ada riba kerana terdesak.</li> <li>Diharuskan bekerja di kilang arak kerana terdesak kerana tiada pekerjaan selainnya tetapi dalam masa yang sama, dia perlu berusaha untuk mencari pekerjaan lain yang relevan dengan kehendak agama Islam.</li> </ul>
Keringanan Mengubah atau Menukar (تَحْفِيفٌ تَغْيِيرٌ)	<ul style="list-style-type: none"> <li>Menukar atau mengubah formasi solat ketika dalam situasi ketakutan dan ketika menghadapi musuh.</li> </ul>

## 5.8 RUKHSAH SYARAK DARI SUDUT STATUS HUKUM

Para ulama mazhab Syafie membahagikan rukhsah kepada lima bahagian. Lima bahagian ini dijelaskan secara contoh seperti yang dinyatakan dalam Jadual 5.4.

**Jadual 5.4:** Rukhsah Syarak dari Sudut Status Hukum dan Contohnya (Mazhab Syafie)

Jenis	Contoh
Rukhsah Wajib (رُخْصَةٌ وَاجِبَةٌ)	<ul style="list-style-type: none"> <li>Memakan bangkai, meminum arak atau berbuka puasa ketika terdesak kerana kelaparan boleh membawa kemudarat diri.</li> <li>Ia adalah rukhsah yang wajib dilakukan demi menyelamatkan nyawa.</li> </ul>
Rukhsah Sunat (رُخْصَةٌ مَنْدُوبَةٌ)	<ul style="list-style-type: none"> <li>Qasar solat dan berbuka puasa dalam musafir.</li> </ul>
Rukhsah Harus (رُخْصَةٌ مَبْلَغَةٌ)	<ul style="list-style-type: none"> <li>Akad jual beli salam, sewaan rumah, kereta dan lain-lain serta akad muamalat yang seumpamanya.</li> <li>Ini adalah rukhsah harus yang diberikan oleh syarak kerana ianya merupakan keperluan.</li> </ul>
Rukhsah Menyalahi Keutamaan (رُخْصَةٌ خِلْفُ الْأُوَلَى)	<ul style="list-style-type: none"> <li>Qasar atau jamak solat, berbuka puasa dalam musafir bagi orang yang tidak mengalami kesukaran.</li> <li>Melafazkan kekufuran ketika dipaksa dalam keadaan hati tetap beriman.</li> </ul>
Rukhsah Makruh (رُخْصَةٌ مُكْرُونَةٌ)	<ul style="list-style-type: none"> <li>Qasar solat yang musafirnya kurang daripada dua marhalah.</li> </ul>

## 5.9 CABANG ATAU PECAHAN KAEDAH ASAS 3

Tahukah anda daripada kaedah asas kesukaran membawa kemudahan terbentuk daripadanya dua kaedah lain? Dua kaedah tersebut adalah seperti yang ditunjukkan dalam Rajah 5.3.



**Rajah 5.3:** Dua pecahan kaedah daripada Kaedah Asas 3 (kesukaran membawa perubahan)

Bagaimanakah dua pecahan kaedah ini boleh diaplikasikan? Mari kita lihat Jadual 5.5 untuk mempelajarinya dengan lebih lanjut.

**Jadual 5.5:** Dua Kaedah Cabang atau Pecahan daripada Kaedah al-Masyaqqah Tajlib al-Taysir

Pecahan	Maksud	Contoh
Apabila Sesuatu Itu Sempit, Hukumnya Menjadi Luas (إِذَا ضَاقَ الْأَمْرُ اَتَسَعَ)	<p>Sesuatu perkara itu apabila sukar dan menyempitkan manusia, maka hukumnya menjadi luas. Dengan kata lain, segala sesuatu itu apabila sukar dilakukan, hukum pelaksanaannya menjadi mudah dan longgar.</p> <p>Menurut Syeikh 'Izzuddin bin 'Abd al-Salam, kaedah ini bertepatan dengan syariat Islam yang dibina berdasarkan prinsip kemudahan dan bukannya menyukarkan. Ini merupakan rahmat pensyariatan Islam untuk membawa kebahagiaan kepada umatnya atau manusia seluruhnya di dunia dan akhirat dengan memberikan keringinan sepanjang dalam situasi yang merumitkan dan membebangkan.</p> <p>Dalam keadaan demikian, Islam memperluaskan hukum bagi kesempitan tersebut untuk menghilangkan masyaqqah yang wujud. Selain itu, kaedah ini juga berasal daripada fatwa dan pendapat imam al-Syafie ketika beliau ditanya beberapa soalan berkaitan permasalahan fiqh.</p>	Apabila ketiadaan air untuk berwuduk, maka hukumnya menjadi luas dengan mengharuskan tayamum.

<p>Apabila Sesuatu Itu Longgar atau Luas, Hukumnya Menjadi Sempit (إِذَا اَتَسْعَ الْأَمْرَ ضَاقَ)</p>	<p>Apabila sesuatu masyaqqah itu hilang, maka hukum pelaksanaannya kembali pada asalnya. Antara lain, maksudnya ialah status hukum itu luas ketika situasi darurat dan apabila situasi darurat itu hilang, maka hukumnya disempitkan kembali seperti mana hukum asalnya. Imam Ghazali di dalam karyanya <i>Ihya' 'Ulum al-Din</i> telah menggabungkan kedua-dua kaedah tersebut dengan ungkapan:</p> <p style="text-align: center;">كُلُّ مَا تَجَاوَزَ عَنْ حَدِّهِ اَنْعَكَسَ إِلَى ضِدِّهِ</p> <p>Maksudnya: "Setiap yang melampaui batas, maka hukumnya dikembalikan kepada yang berlawanannya."</p>	<p>Seseorang tidak boleh sewenang-wenang memilih tayamum berbanding wuduk dalam urusan bersuci, melainkan ada sebab rukhsah seperti sakit atau tiada air.</p>
--	--	---



### SEMAK KENDIRI 5.1

1. Kemukakan dua pecahan kaedah yang terbentuk daripada kaedah kesukaran membawa kemudahan berserta contoh yang relevan.
2. Kaitkan dua pecahan kaedah tersebut dengan isu fiqh semasa di Malaysia.
3. Senaraikan tiga kategori masyaqqah mengikut perspektif syarak berserta contoh.
4. Berdasarkan pengetahuan anda, sebutkan tujuh faktor keringanan syarak.

## 5.10

### PERANAN KAEDAH ASAS 3 DALAM MEMUTUSKAN SESUATU HUKUM DAN FATWA DI MALAYSIA

Akhir sekali, mari kita pelajari peranan kaedah fiqh yang ketiga ini dari sudut sumber hukum, hujah sokongan dan implikasinya dalam memutuskan sesuatu hukum dan fatwa di Malaysia. Mari kita lihat peranannya satu persatu dalam bahagian seterusnya.

## 5.10.1 Kaedah Fiqh sebagai Sumber Hukum

Kaedah kesukaran membawa kemudahan dan kaedah pecahannya merupakan antara kaedah yang berperanan dalam menentukan dan menyelesaikan isu fiqh semasa. Mufti dan ulama telah mengguna pakai kaedah fiqh ini dalam memutuskan hukum dan fatwa. Malah, dengan adanya kaedah fiqh tersebut, ia dapat membantu mufti dan ulama menyelesaikan berbagai-bagai permasalahan yang timbul.

## 5.10.2 Kaedah Fiqh sebagai Hujah Sokongan

Penggunaan kaedah fiqh oleh mufti dan ulama sebagai hujah sokongan dalam menentukan hukum dan fatwa dapat diteliti dalam perkara yang disenaraikan berikut:

### (a) Hukum Penggunaan Penandaan Berdakwat bagi Pesakit Kanser

Keputusan muzakarah Jawatankuasa Fatwa Majlis Kebangsaan bagi Hal Ehwal Agama Islam Malaysia kali ke-90 yang telah bersidang pada 1 Mac 2010 membincangkan hukum penggunaan tanda berdakwat bagi pesakit kanser. Muzakarah telah memutuskan bahawa penggunaan tanda dakwat untuk rawatan pesakit kanser dengan menggunakan dakwat *Holbein Drawing Ink* yang telah disahkan kandungannya tidak mengandungi najis adalah diharuskan dan pesakit boleh berwuduk seperti biasa, memandangkan dakwat tersebut hanya dimasukkan di bawah permukaan kulit.

Antara hujah yang diguna pakai dalam isu ini adalah seperti berikut:

- (i) Penandaan berdakwat bagi pesakit kanser adalah salah satu daripada kaedah perubatan yang memberikan kemudahan kepada pesakit kanser yang perlu mendapat rawatan di semua hospital seluruh negeri di Malaysia. Kajian oleh Jabatan Kimia Malaysia ke atas dakwat yang digunakan iaitu *Holbein Drawing Ink* adalah untuk memastikan tiada kandungan najis atau sebarang kandungan alkohol di dalamnya. Kajian tersebut mendapati bahawa lemak atau minyak haiwan tidak dikesan dengan menggunakan "teknik FAME", kromatografi gas (GC) dan hanya mengandungi terbitan sebatian etanol (alkohol);
- (ii) Dengan penggunaan kaedah penandaan berdakwat ini, pesakit tidak perlu menjalani proses penandaan secara berulang kali memandangkan kesan dakwat tersebut akan berkekalan selama empat hingga lima bulan dan ia tidak menyebabkan dakwat tersebut

terperangkap pada sel yang dipanggil *fibroblast* (sel perut) yang berada di lapisan dermis kulit;

- (iii) Islam meletakkan kaedah kesukaran membawa kemudahan untuk memudahkan kesukaran itu diatasi dengan mengambil sesuatu yang mudah atau senang. Kaedah ini meletakkan bebanan bagi perkara yang susah, dapat dimudahkan bagi keringanan sesuatu urusan; dan
- (iv) Dalam isu penyakit pula, maka rukhsah adalah lebih diutamakan kepada pesakit sehingga diharuskan untuk bertayammum kerana ditakuti akan menyebabkan penyakit merebak dan lambat sembuh.

**(b) Hukum Pemindahan Organ**

Majlis Fatwa Kebangsaan yang bersidang pada 23 dan 24 Jun 1970 telah membincangkan pemindahan organ, secara khususnya tentang pemindahan jantung dan mata. Persidangan ini telah memutuskan bahawa pemindahan jantung dan mata orang yang telah meninggal dunia kepada orang yang masih hidup adalah dibenarkan (harus) dalam Islam dengan beberapa pertimbangan yang telah dipersejui seperti pemindahan organ yang dilakukan bagi tujuan rawatan ialah pilihan terakhir bagi menyelamatkan nyawa pesakit yang menghidap kegagalan organ peringkat akhir.

Kaedah fiqh yang diguna pakai dalam hukum pemindahan organ ini adalah berasaskan realiti bahawa pemindahan organ ini dilakukan dalam keadaan terdesak. Ini kerana tidak ada pilihan lain bagi menyelamatkan nyawa pesakit. Dengan kata lain, pemindahan organ dilakukan dalam keadaan yang sangat mendesak dan mustahak. Keselamatan nyawa pesakit adalah amat bergantung pada pemindahan organ tersebut.

Antara kaedah fiqh yang digunakan ialah kesukaran membawa kemudahan. Pemindahan organ ialah ikhtiar yang diilhamkan oleh Allah s.w.t. kepada manusia sebagai kemudahan bagi mengatasi kesukaran yang dihadapi oleh pesakit kegagalan organ peringkat akhir. Ini bertepatan dengan ayat al-Quran yang bermaksud:

“...Allah mengehendaki kamu beroleh kemudahan dan Dia tidak mengehendaki kamu menanggung kesukaran...”

(Surah al-Baqarah 2: 185)

(c) **Hukum Pelaksanaan Ibadah bagi Pesakit yang Menggunakan Beg Kolostomi**

Keputusan muzakarah Jawatankuasa Fatwa Majlis Kebangsaan bagi Hal Ehwal Agama Islam Malaysia kali ke-79 yang bersidang pada 6 hingga 8 September 2007 telah membincangkan hukum pelaksanaan ibadah bagi pesakit yang menggunakan beg kolostomi. Muzakarah ini telah memutuskan bahawa:

- (i) Pesakit yang menggunakan beg kolostomi dikategorikan sebagai mereka yang mengalami masalah darurat dan tidak dianggap sebagai menanggung najis. Oleh itu, mereka tidak perlu mengosong atau membersihkan beg kolostomi setiap kali berwuduk atau menunaikan solat; dan
- (ii) Wuduk yang diambil oleh pesakit harus digunakan untuk melaksanakan semua ibadah termasuk menunaikan solat fardu sehingga wuduk tersebut terbatal.

Keterangan atau Hujah:

- (i) Istilah “kolostomi” merujuk kepada keadaan sebahagian usus besar (*colon*) di dalam abdomen yang dibuka dan pembukaannya disalurkan ke bahagian dinding abdomen dan dilekatkan pada kulit. Hujung usus ke bahagian dubur (rektum) tidak lagi dapat berfungsi seperti biasa. Beg kolostomi dipasang pada abdomen yang ditebuk di mana usus keluar daripada dinding abdomen tersebut. Pengeluaran najis tidak akan dapat dikawal sama sekali oleh pesakit;
- (ii) Kebanyakan pesakit kolostomi merasa was-was untuk menunaikan amalan fardu ain terutamanya solat. Persoalan yang ditimbulkan adalah bagaimana harus mereka menguruskan kolostomi mereka semasa mengambil wuduk dan semasa menunaikan fardu solat. Adakah mereka perlu mengosongkan pundi kolostomi mereka setiap kali mengambil wuduk atau untuk menunaikan solat? Adakah wuduk akan terbatal dengan sebab keluar najis tanpa boleh dikawal ke dalam pundi kolostomi?;
- (iii) Isu batal wuduk apabila keluar sesuatu menerusi salah satu daripada dua kemaluan seperti yang dibahaskan oleh ulama adalah dalam konteks orang yang sihat. Bagi yang berpenyakit atau mengalami masalah keluar sesuatu di luar kawalan, Islam memberikan kaedah penyucian dan pelaksanaan ibadah kerana mereka dianggap orang yang dalam keuzuran;

- (iv) Masalah kolostomi berbeza dengan masalah sulus al-bawl kerana kebersihannya lebih terjamin. Oleh itu, dari sudut hukum, ia tidak boleh diqiasikan kepada mereka yang mengalami sulus al-bawl;
- (v) Memandangkan pengeluaran najis bagi mereka yang mengalami masalah kolostomi tidak boleh dikawal, mereka dianggap berada dalam keadaan darurat yang tidak terikat dengan taklif syarak dalam beberapa aspek ibadah. Mereka juga tidak dianggap sebagai menanggung najis dan boleh melaksanakan semua ibadat;
- (vi) Pesakit kolostomi dibolehkan mengambil sekali wuduk untuk semua ibadah yang hendak dilaksanakan sekiranya wuduk tersebut tidak terbatas. Namun, sekiranya tiada kesukaran bagi mereka untuk memperbaharui wuduk, ia adalah disunatkan; dan
- (vii) Islam adalah agama yang memberi kemudahan berdasarkan dalil daripada al-Quran dan hadis Nabi yang banyak membincangkan perkara tersebut. Keharusan dalam permasalahan ini juga berdasarkan kepada kaedah kesukaran membawa kemudahan dan kaedah pecahannya iaitu apabila sesuatu itu sempit, hukumnya menjadi luas. Oleh itu, pesakit tidak wajar disyaratkan untuk mengosong atau membersihkan beg kolostomi setiap kali berwuduk kerana ia akan menyukarkan mereka melakukan ibadah.

### 5.10.3 Implikasi Pemakaian Kaedah Fiqh

Apakah implikasi penggunaan kaedah fiqh di dalam memutuskan sesuatu kes? Antara implikasi penggunaan kaedah fiqh dalam memutuskan sesuatu kes adalah seperti berikut:

- (a) Menjadi sandaran hukum kepada mufti dan ulama;
- (b) Membantu mufti dan ulama untuk mengenal pasti isu yang dipertikaikan;
- (c) Membantu mufti dan hakim memutuskan sesuatu isu yang dipertikaikan dengan sebaik-baiknya berdasarkan kaedah fiqh;
- (d) Sebagai hujahan mufti kepada isu yang tidak mempunyai sumber hukum yang jelas; dan
- (e) Menjadi prinsip asas dalam memutuskan sesuatu hukum bagi isu atau permasalahan fiqh yang timbul.

**AKTIVITI 5.3**

1. Bolehkah seseorang membuat solat jamak semata-mata untuk menonton perlawanan bola sepak?
2. Bolehkah seseorang membuat jamak takhir kerana hadir mesyuarat penting yang memakan masa dua waktu solat? Bincangkan dua perkara ini bersama rakan anda dalam kumpulan dan bentangkan di dalam kelas nanti.

**SEMAK KENDIRI 5.2**

1. Kemukakan tiga contoh implementasi kaedah ini dalam isu fiqh kontemporari di Malaysia.
2. Berikan pendapat anda tentang implikasi utama yang akan timbul sekiranya kaedah kesukaran membawa kemudahan tidak diperundangkan dalam perundangan Islam.

**RUMUSAN** .....

- Kaedah al-masyyaqqah tajlib al-taysir membawa maksud kesukaran membawa kemudahan. Melalui prinsip kaedah ini, Islam memberi pengecualian kepada manusia apabila berhadapan dengan situasi yang mendesak. Berdasarkan kaedah ini, terbentuklah semua hukum rukhsah dalam syariat Islam.
- Kaedah ini juga disebut sebagai "al-qawa'id al-khams al-kubra" atau "al-qawa'id al-asasiyyah".
- Antara contoh bagi kaedah ini ialah doktor lelaki diberi kelonggaran boleh melihat aurat wanita ajnabi dengan tujuan untuk menjalankan rawatan, disyariatkan talak (cerai) dan khuluk (tebus talak) untuk kemudahan kepada pasangan yang tidak serasi dan lain-lain.
- Sumber asal atau dalil bagi kaedah ini ialah al-Quran dan hadis.

- Terdapat tiga kategori masyaqqah mengikut perspektif syarak iaitu kesukaran yang sangat berat (al-masyaqqah al-'azimah), kesukaran tahap pertengahan (al-masyaqqah al-mutawassitah) dan kesukaran tahap ringan (al-masyaqqah al-khafifah).
- Terdapat empat kriteria masyaqqah iaitu:
  - Masyaqqah yang tidak ada pertembungan dengan nas syarak atau qat'i;
  - Masyaqqah yang melebihi batasan keupayaan ataupun di luar kemampuan seseorang;
  - Masyaqqah yang memberatkan mukallaf dalam melakukan ibadah; dan
  - Tidak terdiri daripada masyaqqah yang sememangnya perlu ditanggung oleh mukallaf.
- Terdapat tujuh faktor keringanan yang diberikan oleh syarak apabila seseorang mukallaf itu berhadapan dengan kesukaran yang sukar dielakkan. Faktor tersebut adalah dalam musafir, sakit, dipaksa, terlupa, jahil, kesukaran umum dan kekurangan.
- Terdapat tujuh rukhsah syarak dalam ibadah iaitu takhfif isqat, takhfif tanqis, takhfif ibdal, takhfif taqdim, takhfif ta'khir, takhfif tarkhis dan takhfif taghyir.
- Terdapat lima rukhsah syarak dalam status hukum iaitu rukhsah wajibah, rukhsah mandubah, rukhsah mubahah, rukhsah khilaf awla dan rukhsah makruhah.
- Terdapat dua pecahan atau cabang yang terbentuk daripada kaedah al-masyaqqah tajlib al-taysir iaitu apabila sesuatu itu sempit, hukumnya menjadi luas dan apabila sesuatu itu longgar atau luas, hukumnya menjadi sempit.
- Kaedah Asas 3 memainkan peranan dan implikasi yang penting dalam memutuskan sesuatu hukum dan fatwa di Malaysia. Antaranya ialah penentuan hukum bagi pelbagai keadaan perubatan.
- Antara implikasi bagi kaedah ini ialah menjadi sandaran hukum kepada para mufti dan ulama serta membantu mufti dan ulama untuk mengenal pasti isu yang dipertikaikan.

**KATA KUNCI**

'Iza 'ittasa'a al-amr dhaqa	Rukhsah mubahah
'Iza dhaqa al-amr ittasa'a	Rukhsah wajibah
Al-masyaqkah al-'azimah	Takhfif ibdal
Al-masyaqkah al-khafifah	Takhfif isqat
Al-masyaqkah al-mutawassitah	Takhfif ta'khir
Al-masyaqkah tajlib al-taysir	Takhfif taghyir
Al-qawa'id al-khams al-kubra	Takhfif tanqis
Rukhsah khilaf awla	Takhfif taqdim
Rukhsah makruhah	Takhfif tarkhis
Rukhsah mandubah	

**RUJUKAN**

Ab Latif Muda, & Rosmawati Ali. (2000). *Kaedah-kaedah fiqh*. Kuala Lumpur: Pustaka Salam.

Al-Hasri Ahmad Muhammad, & Muhammad 'Azzam 'Abd al-'Aziz. (2004). *Al-qawa'id al-fiqhiyyah: Dirasat 'amaliyyah tahliliyyah muqaranah*. Kaherah: Universiti al-Azhar.

Al-Nadwiyy 'Ali Ahmad. (2000). *Al-qawa'id al-fiqhiyyah*. Damsyik: Dar al-Qalam.

*Al-Qur'an al-Karim.*

*Al-Sunnah al-Nabawiyyah.*

Al-Suyuti Jalal al-Din 'Abd al-Rahman. (1378). *Al-asybah wa al-naza'ir fi qawa'id wa furu' fiqh al-syafi'iyyah*. Beirut: Dar al-Fikr.

Al-Zarqa' Ahmad Muhammad. (2007). *Syarh al-qawa'id al-fiqhiyyah*. Damsyik: Dar al-Qalam.

Ibn Salih 'Umar. (2004). *Al-madkhil ila dirasat al-fiqh al-Islam*. Universiti Sharjah: Markaz al-Bihus wa al-Dirasat.

Jabatan Kemajuan Islam Malaysia. (2013). *e-fatwa: Portal rasmi fatwa Malaysia*. Dicapai dari <http://www.e-fatwa.gov.my/>

Muhammad Soleh Amad. (2002). *Al-qawa'id al-fiqhiyyah*. Kuala Lumpur: Pustaka Abdul Majid.